

四庫全書

集部

欽定四庫全書

集部  
宮教集卷一至三

詳校官麻吉士臣翁樹培

主事臣呂雲棟覆勘

謄錄監生 臣 陳 遂

謄錄監生 臣 李光緒

謄錄貢生 臣 苗序庶

欽定四庫全書

集部四

提要

宮教集十二卷

別集類三 宋

臣等謹案宮教集十二卷宋崔敦禮撰敦禮有島言已著錄焦竑國史經籍志載崔敦禮集二十卷其本久佚他家書目亦罕著於錄故厲鶚宋詩紀事不及敦禮之名惟永樂大典載有敦禮宮教集其詩文篇帙尚富大抵

格律平正詞氣暢達雖不能領新標異而周規折矩尺寸不踰前輩典型茲猶未墜未可等諸自鄮無譏謹採掇編次釐為十有二卷第五卷內有進重刪定呂祖謙所編文鑑劄子一篇稱刪去增添別寫進呈云云考李心傳朝野雜記謂呂祖謙文鑑既成近臣密啓其失當乃命直院崔大雅更定增損去留凡數十篇大雅者其弟敦詩字也朱子語類嘗

論祖謙編錄文鑑事亦有在敦詩刪定奏議  
之語是此劄當出敦詩不出敦禮似乎永樂  
大典偶爾誤題然或敦詩刊定進呈敦禮代  
為草奏亦未可定今既別無顯証姑仍其舊  
錄之而附著其舛互如右乾隆四十六年九  
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

宮教集卷一

宋 崔敦禮 撰

賦五首

石湖賦

崔子問於石湖先生曰富貴人所願閒寂不可居位通顯者有洋洋之志處幽曠者懷戚戚之悲此人之常情也先生芥鍾鼎而不盼屣軒冕而若遺居無牆宇之飾而丘壑以為樂家無珠玉之玩而泉石以為資不已迂

乎先生莞爾而笑曰子安知予之真樂哉寓形宇宙間  
身世同浮萍吾常委心任去留奚肯逐物而營營時乎  
見用則進而上紫微之掖一朝遇坎則退而歸石湖之  
耕方其余之在紫微未嘗忘江湖之夢及其余之耕石  
湖也益自覺公侯之輕蓋山林斯予之至樂而簪紱不  
能以櫻情者也子嘗覽吾石湖之勝矣其地有殘壙故  
壘斷岸長雲彌迤延連繚曲幽深者越王之所城也東  
臨具區觀滄波之杳渺怒濤之軒轟風帆浪楫出滅煙



雲者鷓夷之所經也西傍越溪見吳王之臺想夫千軍  
萬馬銜枚潛渡黃金白壁之殿化而為荒萊南連橫山  
北睇亞字城樓觀相望翼乎崢嶸其地勢奇古如此自  
越迨今千五百歲霜露之所蒙翳狐狸之所窟處至於  
登臨之要則不得而擇其所我乃披天奧發地藏平夷  
土塗誅蕪蕪荒扶萬象之偃蹇洗千古之淒涼築農圃  
湖山之觀聳碧城崑閩之丘岫幌納千峯之秀雲莊開  
萬壑之幽夜月兮嬉漁春風兮芳洲渺煙波兮鷗鷺適

忘機之樂度雪橋兮龜魚聽拄杖之遊

皆園中名

至於水靜

鵠立林幽鶴鳴漾湖光於几席占山影於臺亭花粲粲

以昌披木欣欣其敷榮茁茁兮十里琅玕兮滿城其他

幽芳奇觀間見層出又不可殫舉而悉名於是或命籃

輿或漾輕舟或舒嘯以登皋或賦詩而臨流或掘雲於

磔嶠之頂或採月於澄泓之洲若乃浩蕩連空月華正

中鑿秋毫於浮玉倒寒影於垂虹鼓棹踏松江之浪扣

舷吟笠澤之風訪蓴鱸於漁父詰龍橋於江童此天下

之至樂也其何得以加之崔子聞之曰先生樂哉矛頭  
浙米劍頭之炊不如枕流漱石脫富貴之危機翻手作  
雲覆手作雨不如遺名絕俗與煙月為侶先生樂哉雖  
然趨朝市者患於既倦而不知歸入山林者失於固藏  
而不肯仕先生石湖之樂誠樂矣當如江上之清風山  
中之明月欣然接之可以寓意而不可以留意若曰抱  
其道而不施懷其材而不用必欲就閒逸樂幽隱為將  
老之計此余所未取也於是作石湖招隱之歌歌曰清

且泚石湖之水高嶄巖石湖之山湖之幽可釣可遊湖  
之側宜稼宜穡有美一人兮樂無涯朝出遊兮莫來歸  
曳杖兮吳臺維舟兮越溪念夫君兮淹留葺蘭芷兮芳  
洲長松卧壑兮風颭深山紫玉兮光彩浮萬牛回首  
兮挽山丘五城一覩兮禮必優宜規明堂兮備前旒去  
來去來兮石湖不可以久留

種松賦

崔子居山間種松於東岡之上地曠而平培土而密築

其殖之也若搢袂之挿其憂之也若嬰兒之育戢戢乎  
黃茅之底眇眇乎蒼岑之麓有客過而歎曰勤矣子之  
種松也吾聞天施地生雨露則一草木之長於松為齎  
經年僅益於毫末再歲尚湮於蓬棘蓋屢補而莫齊或  
百枚而得一形如偃蓋兮待千歲之久化為茯苓兮由  
百歲之積今子施種藝之功竭壅培之力以附土之寸  
根待千雲於異日不其迂哉余曰噫嘻客之言過矣夫  
植之微者本必固長之吝者末必榮木有亟茂而先顛

物有速蕃而驟零栽桃李者早華種榆柳者易陰柞薪  
析而愈盛樗樵剪而還生然皆摧折於飛雪之後憔悴  
於嚴霜之辰隨寒暑以同化與糞壤以俱淪迺若松之  
茂也幹排風雷根裂崖石鱗蹙百丈髯蒼千尺其柯參  
天則鸞鳳棲其巔其肪入地則龍蛇伏其窟凜高節兮  
四時不能易其操建大厦兮萬牛不得輕其力茲豈衆  
木之凡姿與夫百草之弱質者所能比哉嗚呼在物固  
然於人亦爾殖德者不貴其苟種學者匪圖其易濇禮

義之華實毓性情之根柢養其小以成大蓄諸微而至  
著若曰名以暴集為榮行以速成為貴謂片善為無益  
以寸長為可棄是猶冀合抱之林而不養其拱把之時  
望十圍之木而不植於徑寸之際者也

閒居賦

丁亥之秋余既反闔待次若不與世相聞者作閒居賦  
云釋吏塵之鞅掌兮望吾廬而載旋野鶴脫於樊籠兮  
解病馬於馭編嗟余居何甚小兮聊復有此池園苟余

意足有適兮宜必金谷與平泉余既浸以成趣兮畫人  
事而與辨曰悠悠其莫徃來兮壘柴門之蒼蘚朝吟蘆  
花之白雪兮暮數漁舟之青烟時捫腹而徐行兮俄曳  
杖乎池邊龜魚識余之履聲兮唼蘋藻而不喧遲余步  
乎東疇兮或嘉蔬之蔥蒨擷杞菊而將瓜芋兮袖雨露  
之微泣忽長風之吹來兮閱萬柳之喧駢傾若相逾蹙  
若相鬪兮各獻狀而爭妍余矯首而徜徉兮欲飄飄而  
俱仙穆室處之晏娛兮樂圖書之舒卷耿青燈而深語



兮下潛幽而窮玄驚倦僕之僵屏兮鼯夜床之對眠感  
晨鷄之呼覺兮悵流光之易遷於是懼然而起起而歌  
曰歲荏苒兮風露手種木兮今繁繁世我忘兮我寧忘  
世去來去來兮吾居不可久間

大暑賦

盛夏之月龍宿明鶉火棲赤燥奮怒炎帝施威有客瞻  
翔陽之騰翥望火雲之燒空氣鬱陶兮蒸體汗淋漓兮  
沾裳乃授簡於崔子曰暑至此極矣抽子秘思騁子妍

辭為余賦之崔子曰唯唯昔者侯湛成章于晉代繁欽  
流詠于東都在隋有盧生之麗句於魏摘子建之奇詞  
仲宣仰庭槐而長嘯孔璋寓陶燭以興悲周人垂瘳暑  
之詠明遠成苦熱之詩皆所以發騷人之妙思歌隆暑  
之歎歛者也且夫勾芒既往祝融乃來紫蠹丹幢左右  
從陪炎官熱屬前導後隨朱冠緹顏嘘呵火維煽以烈  
焰奮以毒威御燭龍以長驅兮駕火輪而飛馳前執衡  
使舉麾兮麗朱鳥而承旗環天地以為爐兮播造化於

治中運陰陽以為炭兮爍萬物其猶銅採扶桑之高燎  
兮熾中街之朱光溫風攬乎萬里兮氣鬱烟而迷空土  
潤漚以蒸熇兮時澆汨而蘊隆凝赤宰而聳岳兮閃紅  
倏焉而驚虬豐隆盤旋而空鳴兮灑郊斐亶而復收於  
是陰壑煩寒谷焦冷泉沸氷天熇玉井煙合凌陰埃生  
西域消長積之雪北極無不釋之氷乘清風而遊廣寒  
兮廣寒燠其增煩排閭闔而入凌兢兮凌兢翕焉如蒸  
天丁退聽以屏息兮早魃健行而肆志飛廉嘘以喘息

兮吁號渴而欲斃豐山之神人心鬱乎清冷之宮姑射  
之仙子汗決乎冰雪之體噫神焦與鬼爛兮彼將焉其  
逃避若乃層潭之府極深之淵毒陽激爍陰火潛然熇  
炭重燔吹炯九泉與日噴薄流耀揚娟朱熒綠煙要眇  
嬋娟河漢沸兮若煮川瀆湧兮如湯螭龍喘以鱗折兮  
鯢鯢躁而甲張長鯨嚇鯢以吐沫巨鰲暴骼而且僵沙  
石為之熟爛水恠為之糜揚虎蛟鈎蛇遭鼎烹之毒象  
鹿狐貉有釜遊之傷馮夷陽侯渴死乎重淵之窟馬銜

蝸蟻鬱勃乎波濤之鄉至夫沈陽騰射散越山林赫然  
其暉齊攻錯陳原兮欲燎野兮欲焚木枯兮欲焚葉卷  
兮欲焦隆曦穿漏林無清陰視萬木之結蔭猶火傘其  
迷雲良田龜坼而塵飛兮泥塗化而為緹駢嗟空翔與  
陸走遭燭魚以飛奔鳥苦熱而不敢飛兮惟塌翼而浴  
泥牛喘甚於焚角兮徒使人而增悲猛獸垂鼻以吐氣  
兮韓盧露舌而涎垂蠅晝飛以繁案兮蚰宵集而侵肌  
煩蟬咽以噪風兮風既至其猶火鳴鳩應以呼雨兮雨

不至而奚為於是陸有交蓋河無行舟宵不明燭晝不  
遠遊食不飲渴衣不襲裹行者暘道而欲仆居者執熱  
而露頭負者澁旋而肩頰耘者膚裂而脂流走通衢兮  
如履乎身熱之坂上層巒兮如陟乎暘谷之丘單絺甚  
狐貉之燠當風有環爐之憂冰臺風軒如坐乎溫室陰  
谷寒澗變而為炎洲飲寒泉以禦渴兮渴不止欲化鯨而  
吞海氣噓吸以祛躁兮躁之極思凌雲而上天佩壬甲之  
靈符兮於煩懷其奚益食鼯鼠之寒脯兮雖萬斤為徒然

又安可責效於抱朴不可熱之藥而服飛雪之散與夫  
元冰之丸者哉此少陵所以願作冷秋菰昌黎所以思  
欲避寒門袁紹所以有避暑之飲傅咸所以開感涼之尊  
者也詞未竟客躍然而前曰子賦暑至矣讀之若坐火  
井而居炭谷遊焦溪而沐湯泉有可以清暑者得聞其  
說乎崔子曰大冥之墟孤桐生焉下瞰冰淵之湄上直  
寒涯之巔左當風谷右臨雲谿迥九秋之驚飈凋三冬  
之寒威零雪積其根霏霜封其枝神泉漱其藩清露潤

其皮此蓋木之清冷而寒潔者也於是翦寒柯剖孤莖  
匠石運斤師襄均聲寒水之玉以為徽冰蠶之絲以為  
弦水精之珥以為玦精冰之金以為懸爾乃歌南風之  
古曲奏綠水之清音迸流泉之幽韻動積雪之悲吟弄  
羽則紅雲含霜叩商則烈日成霖躍流魚於澄淵舞鸞  
驚於庭陰此聲音之至清也可以清暑乎客曰未可也  
崔子曰虛堂清室涼軒寒館含寒露以植臺迎清風而  
立觀月牖對晃風櫺蕭疎左峙水山右直雪宮睽眾庠



豁閒敞開通危樓鬱其將起遂凌虛而上躋鳥騰翅于  
甍標咸乘風而欲飛齊獸口以湧雷時梗概於滌池軼  
星辰于大半垂雲迴帶於芬楣伏櫺檻以俯聽聞雷霆  
之霍揮消霧埃于中天集微涼之澄清問素娥若有答  
察雲師之所憑上飛闥而仰觀正瑤光與玉繩爾乃躡  
露舄開雲扃鳳簫吟鼉鼓鳴攀井幹之巖巖登延閣之  
岌堯引雄風于洞穴植仙掌於良宵拂琉璃之珍簞弄  
明月之圓綃動颼颼於翠帳散霏微於綺寮曜冰梁而

發霜刃寫詩人之風騷詠楚臺披襟之語歌漢宮大風  
之謠此宮室之至清也可以清暑乎客曰未可也崔子  
曰雕胡之飯錦帶之羹霜蓄之茹露葵之英藟菰蒲筍  
間之香芹銀絲鱠鮒散雪飛刃筋以冰犀盤以水精庖  
霜淅玉滿坐風生汲冷漬穉其清如水携綵籃於中園  
掇槐葉於高枝糝桃木之玉屑和寒滓兮與俱乃使元  
冥適鹹蓐收調辛味蕪芍藥施和既醇色碧鮮以照筋  
相香飯以苞蘆經齒冷以嚼雪人爭勸于投珠志欲隨

於駸褭暇則飲夫屠酥獻君王之寒殿薦開冰之清壺  
乃若盧橘熟素柰成陸採檜桃淵摘芡菱林珍水實錯  
雜扶檠浮甘瓜於寒水沉朱李於清泉食曹林之新梅  
擘太華之芳蓮壺盛甘醴之液坐列飲中之仙環曲池  
以流杯如長鯨之吸川及其至也酒罷更闌風留月軒  
試谷簾之絕品破龍焙之香團湯發雲腴之醞盞浮花  
乳之圓濺七甌之輕雪兩腋淒其生寒此飲食之至清  
也可以清暑乎客曰未可也崔子曰洞庭長湖洪波翻

瀾長江會宗六月不暄溟漭渺沔汗汗油油即之無窮  
察之無邊駭浪瀑洒驚濤飛湍崩雲屑雨蕩日連天雷  
奔電激鼓作礪岩望之者使人毛髮聳立心悸而膽寒  
爾乃命水客泛輕舟齊棹妓發棹謳奏淮南度陽阿篙  
工唱楫師和鞭蜩蚶憚蛟螭卷翡翠斬鼉鼉戮水豹殄  
鱗族招白鷗下高鵠然後乘勁風揭百尺泝洄沿流  
千里一息訪乎鮫人之居入乎淵客之室造乎江妃之  
館追乎海童之迹擊長楫於中江想萍實之復形訪蓬

萊之清居思漢武之所經臨澄流而沾襟弔屈原與靈  
胥而又昧潛險搜瑰竒摸瑋瑁捫背螭剖明月之胎珠  
濯夜光之流離若乃浮情博覽忘夕宵歸渾星辰而涵  
泳俯仰與之俱迷觀藍田之出月吐元珠於淵驪瀉千  
尋之縞練堆萬頃之琉璃此遊樂之至清也可以清暑  
乎客曰未可也然淒涼之色已動於眉宇之間崔子又  
從而言曰丘壑之勝林泉之竒南山之巔北山之廡有  
風月以為助有雲烟以相隨有鴻鳥以為侶有田園以

時籽有魚釣以自適有琴書以自怡木欣欣而帷成泉  
涓涓而練飛清風颯其來臨幽鶴乘而下之爾乃漱白  
石枕流泉傲睨乎風塵之表笑談乎溪壑之間居水中  
以築室葺荷蓋以為房啓蕙帳兮松闌繚琅玕兮成堂  
琢寒犀兮為鎮緝薜荔兮為裳飲蒼岑之玉醴斟白水  
以為漿羞玉芝以療饑餐沆瀣而為糧紉綠芰以為佩  
又綴之以蕙纒於是或命巾車或漾輕舟或窈窕以尋  
壑或崎嶇而經丘或採蕨於崇岡或緜魚於清流或濯

纓于滄浪或開襟於山樓或鼓琴以自娛或彈鋏而悲  
謳或脫帽以縱適或杖藜以遨遊或掘雲於嵒嶽之岑  
或採月于澄泓之洲此山林之至清也可以清暑乎客  
曰善吾之願也崔子曰善則善矣而未大也請為子言  
夫清暑之大方今聖天子在上灑掃宇宙清寧乾坤仁  
風惠氣廟刷上下無嚴威虐焰之刑以燂民之肌膚故  
其民溲然休然相安以生無星火疾馳之令以驚民之  
耳目故其民蕭然怡然相嬉以寧無竭源涸澤焦熬峻

急之征故其民得以潤澤其家室無蹈湯赴火汗肌浹  
膚之役故其民皆得逍遙于田里恩同祥風翺德與和  
氣游蒸而為清氛䟽而為冷風垂髻戴白無小大無遠  
近蕭蕭乎如遊清涼之境太清之世不知暑之為暑也  
若乃渠魁元惡肆厥暴怒斲斷屠剔膏流節離之毒日  
作而人不得全其形體焚拆抵掎脅驅迫逐之禍日興  
而人不得集其族類凡厥烝民莫不沸湧灼爛號呼驚  
蹈無有救止羣望而赴愬皇帝於是丕降霖雨雷厲風



行天戈所麾咸順使令舊染之俗攸徂之民徒奮袒呼  
壺漿以迎慰望雲於大旱釋僊蘇於羣情救之火甯置  
之安平清暑之道不具大哉客聞之離席而前拱手而  
立再拜稽首霍然暑退

苦寒賦

日在斗歲將闌陰風怒愁雲繁有廣寒先生問於清虛  
子曰吾觀子憂色無乃畏此苦寒乎予曰然先生曰吾  
以冰肌之質游姑射之山飲吸乎風露之冷綽約乎雪

月之間吾居於此不知其年而子獨以為難於是清虛  
子對曰皇天平分為四時兮寒暑運而相推春陽舒而  
花披兮夏風溼而雲竒秋漢迴以高潔兮夜月清而流  
輝惟窮冬之御冷兮重陰積而慘淒故傳玄寓興于雅  
賦昌黎發詠於新詩張生陳水澗之句阮子形凍海  
之辭梁臣寓直廬而發嘆陸雲當歲莫而興悲斯皆苦  
寒之暴畏寒之威先生誇物外之高忘人間之累謂寒  
為不足畏茲非余之所敢知先生聞之避席而起逡巡

而言曰子之言是矣請子為我賦之清虛子曰可嚴霜  
夜結寒雲晝起驚飈攪乎宇宙兮蕭條亘乎萬里烏蟾  
藏而寒輝兮雨雪飄而不止河漢沍而不流兮天地結  
而凝閉於是焦溪涸溫泉冰火并滅湯谷凝沸潭無涌炎  
風不興死蛟螭於窟穴兮僵虎豹於林垆六龍冰而脫  
髯兮熒惑隱而喪精莫不血凍兮指不拈氣藏兮脣莫  
收肌膚皴而生甲兮衣被冷而如流朱火青而光滅兮  
蘭膏凝而烟浮擁爐猶坐雪之冷兮重襟有懷冰之愁

嗟顓冥之酷烈兮夫與我其何警意燭龍吹於雁門兮  
又疑白鶴語於南州雖挾纊之言不足使楚人暖兮縱  
賜袍之惠何以解范叔之憂若乃孝子卧冰書生映雪  
意雖勤而不倦覩此寒而為輟浴生方擁被以沉吟兮  
宋人亦龜手而拆裂裸壤變為垂繒之俗兮華清不知  
探湯之熱峻肩漆詩客之思墮指凜三軍之節我乃張  
重幄處温室衣狐裘坐熊席盛獸炭之春紅酌羔羊之  
瓊液擷粉萼於新梅繪銀絲於鮮鯽侑以郢客陽春之

曲吹以鄒谷變寒之律先生於是憊然而服乃浩然而  
狂歌歌曰歲云暮兮風怒狂雨雪飄兮雲滄浪烏蟾畏  
威兮為韜光地坼裂兮鱗甲張蛟螭潛兮虎豹僵溫泉  
火井兮為淒涼江漢凝沍兮波不揚又歌曰燎薰爐兮  
陽和擁獸炭兮春多携佳人兮鳴玉珂酌桂酒兮朱顏  
醅一杯相屬君當歌有酒不飲兮奈寒何



欽定四庫全書

宮教集卷二

宋 崔敦禮 撰

五言古詩七首

次韵張伯子餉柑

儒官窓戶寒惟怯日出光獨冷不可耐大杓傾鵝黃洞  
庭隔烟波忽驚風露香開門問誰與知君念荒涼芳包  
照盤新硬句摩天揚山中千頭奴丹黃麗秋陽騷人巧  
採摘燦燦簡冊方君詩追古作語壯韵轉彊屬和郢中

人凋零不成行臨風詠玉臺  
巽霧開密房殷勤此珍餽  
玩味媿莫當但酌潘公醺  
一舉累十觴

對竹有感

庭前抱節君五年不見汝  
去時雙玉槩枝葉稀可數  
歸來兒孫多已滿寸金土  
竹盛人凋零攀枝淚如雨

還孟郎中詩卷用元韻

吟哦兩夫子濯濯春月柳  
金石相擊撞論文自為友  
我欲和陽春高調不容口  
披玩若為稱朝酣玉臺酒



富貴邯鄲夢齒髮金城柳附炎非吾事因心即我友得  
意自忘言咸悔豈滕口幸有君子交淡成非醴酒

嚴子文用范至能韻見贈再和

燈花昨夜喜詩成果符吉長跪讀新詩繡筵鳴寶瑟天  
公怪多取未老雪滿櫛出門會臞仙戴笠卓午日我無  
作詩工而許編杜帙珞玦混圭璋蓬艾間粟秣鷗社媿  
相從敬行順風膝

前用吉字韻問嚴子文疾再和問疾之詩不工

甚矣既辱和章又承用吉字韻為貶率爾繼作  
敬問起居公自謂平生不服溫劑此寡慾之驗  
也何恙不愈詩以見意

日來間何闊坐見月初吉欲往扣齋扉政恐勞取瑟聞  
公清淨緣巧笑却銀櫛露骨秀寒松烘暘燠暖日鍾乳  
無千兩牙籤堆萬帙愛詩屢忘餐愛酒勤種秫心安身  
自輕却老非牛膝

再訊問嚴子文疾

清心止淵水養性順杞柳不信造物兒能妨莫逆友我  
當誦七發瀾翻傾辯口據几遂霍然何辭未能酒

七言古詩三首

泊福山港

我舟欲渡風伯嗔卷帆夜泊滄江津江聲拍枕冷不寐  
起看河漢無纖塵須臾風定水波伏江妃湧起明月輪  
船頭把酒問明月丘丘粉社難忘情狼山咫尺望可到  
一水隔我三家村明月問之寂無語寒光耿耿如相親

金步口人ノ三三三  
卷二  
明朝轉柁好風色月暈北開箕有靈

喜晴

我貧可厭迴腸煎負郭近有桑麻田入春十日九霪雨  
夜聽瀧瀧愁不眠雨師欺壓春無力勾引頑陰朝復夕  
丹杏天桃凍不開來牛去馬昏無色曉來鼓舞耕桑民  
長天洗淨清無雲羲和鞭日從海底照出浩蕩郊原春  
呼兒買酒聚笑語門前且無吏呼怒今年麥飯滑流匙  
更趁新蠶理襦袴江頭烟樹晚戎戎江南嬰笋春事豐

我亦行拋簪綬去飽帆西上趁東風

九日

虎踞城邊九日臺前年黃花何盛哉去年今日瀨陽山  
三徑荒蕪手自刪今年到此百愁有物情改盡花依舊  
花不能言心自知嚼蘂徘徊淚盈袖黃花時節年年好  
我生浩蕩何時了櫛沐從教飽風雨只恐飄零人易老  
客中霜風吹我衣隴頭白雲呼我歸江湖僻處好歸隱  
月上三更聞子規

五言律詩十一首

送梁倅二首

盛德宜時用，屏星久此留。  
中和凝拒砲，溫潤瑩天球。  
太府多材會，清名萬口流。  
亨塗應好在，端的上瀛洲。

一尉千官底，公無勢位分。  
門墻時與進，道義得親熏。  
去矣難留佩，時哉盍致君。  
南風秣陵路，征旆卷行雲。

喜晴

頑雲收四野，皎日麗千門。  
水響魚龍落，雲高鶴鶴翻。  
近

陽書幌暖遶室篆煙昏擬欲尋春去梅花水際村

過三塔

妙墨人間寶千金紙上鷺頻來湖上寺三復柱間題鶴  
化辭遼海鴻飛印雪泥人豪今不見凝竹夕陽西

固城湖

舟泊楚城下當風十頃灣涼生水鑑面人在玉壺間隱  
見雲端樹低昂枕上山江湖有如此一笑白鷗閒

東壩

前夜湖山月今朝瀨水船飄零良自苦浩蕩有誰憐雲  
合前村雨風收別浦煙乘涼趣歸櫂尺是金淵

客枕

客枕愁無寐悠悠夜未分誰同對床雨惟想太行雲黃  
犬行應健飛鴻過亦勤如何萬金信別久寂無聞

邵智卿挽章

列宿郎官帳高風隱士廬歲寒知勁栢日暮厭輕車德  
齒周三老身名漢二疏回頭八男子玉立照堦除



孫

未識嵇中散聞詩孔伯魚謂當從几杖何意作丘墟有  
道齊生死無心任卷舒斯人吾不見遺恨淚沾裾

趙提官挽章

子直  
尊人

典刑前輩近問學古人深有道祇藏韞無言自陸沉憂  
民空白首愛主只丹心遠矣平生志松風掃墓林

誠身古君子耆德老先生言行純無玷經書富滿羸蘭  
階群玉秀桂苑一枝榮有後誰公比文盟壓世英

七言律詩三十首

九月二十九日邇英開講忝預末班講退小集

玉堂之廬即留宿直因賦唐律呈諸講官

五雲扶輦下清廂寶帙初開第一章旋卷班聯回廣殿  
稍留笑語萃公堂紫霄近侍連鑣過黃髮元臣照座光  
顧我自慚陪勝會酒清人散卧斜陽

殿廬紀懷敬用右史舍人韻

官柳陰陰密著行飛來黃鳥忽成雙身沾仙露香猶在

眼飽珍羞賜即扛酒量不多容我醒詩魔無奈得君降  
官閒睡足春風幕紅日三竿看上牕

東宮壽章

恭遇皇太子殿下彌月屆辰前星炳耀紀佳祥於  
甲觀溢喜氣於東朝某夙荷眷知屬居蕃屏逢昌  
辰而有喜陪賀列以無階敢伸重潤之章用祝無  
疆之筭

少陽騰耀毓青宮玉裕淵冲穆睟容主鬯克承宸極重

問安勤致寢門恭  
溫文齒冑全三善  
暉潤登歌備四重  
幼海光浮天序永  
珠源袞袞日朝宗

吹銅和氣集佳祥  
鬱鬱葱葱震色蒼  
山嶽東明開寶禁  
星辰南極注瑤觴  
龍樓照日浮秋曉  
象輅朝天馥御香  
分土莫陪班賀末  
詠歌惟祝壽無疆

至清口聞水閱甚盛  
邊人言辛巳歲敵騎逼淮  
劉信叔軍南岸欲載神勁弩  
至中流射之求數  
舟不可得今戰艦之盛前未有也  
因成四韻

曉日旌旗錦滿川阿童初試漢樓船  
露橈天與神機秘擊楫人同壯志  
堅行恐黃河水可渡已聞青海箭先  
傳佛狸莫夢淮邊樹看攬長蛟下沒淵

題婺州仁風堂寄韓侍郎

丹扆憂勤德意通使君元侍玉皇宮  
親傳天上舜琴曲散作人間莊籟風  
已喜清微消滯鬱亦知委曲到鰥窮  
騷人休復雌雄問千里而今樂事同

公餘燕寢但凝香稍退朝來鴈鷺行政譽已爭銅嶺峻

恩波仍帶繡川長未應尚布春風詔會許重賡夏日章  
皎皎東陽嘉話在到公端類發天藏

江行迂憲使遇風

星使乘槎勢若飛微官奔走遂忘危扁舟掀舞身如葉  
短棹欹斜命綴絲亂眼雲山疑醉夢拍天波浪意蛟螭  
西風送我歸漁浦落日銜山未晚炊

次韻孫撫幹二首

踈狂自許次公醒冷淡無勞沸玉笙滿屋文章天下樂

多情燈火夜深明  
交情問我何清苦  
世路愁人已飽更  
好趁東風動行色  
灑陽煙雨趣春耕

繞几黃雲熟水沉  
得詩閒讀契余心  
文章叔夜廣陵散  
句法武侯梁甫吟  
且喜空囊收趙璧  
不慙擊壤混唐音  
請君便入鷗鳴社  
飯顆相從始自今

次陸倕韻三首

欲將從事到青州  
酌酎鄉中便可侯  
此樂正須君領畧  
踈狂還許我追遊  
一年好處都能幾  
四序難并去莫留

痛飲且圖連夜醉清歡何必錦纏頭

煖烟和氣滿西州  
載酒當輕萬戶侯  
官事不知何日了  
風光宜及早春游  
簿書叢裏偷閒去  
景物妍時到處留  
莫被虛名苦拘束  
野梅官柳暗江頭

文章光艷歷蘇州  
照乘何勞詫魏侯  
鳩杖欲尋江左勝  
鷗盟相約社中遊  
囊空自喜陶朱得  
詩拙還因杜集留  
把玩日吟心似醉  
定須論月廢梳頭

再次韻一首



催花腰鼓徹涼州  
午枕驚回蟻夢侯  
賴有江山餘古意  
可教詩酒負春遊  
登亭舉酒休論晉  
借筯成功合繼留  
慷慨浩歌風日暖  
萬山佳處接吳頭

和沈商卿

一官奔走倦幽尋  
來向江山好處吟  
過眼風光花又落  
闕情勲業鏡頻侵  
到頭春事都無幾  
飛蓋長郊早趁今  
鷗鳥莫驚車馬過  
我來搜句亦無心

和章冠之

光陰轉眼去如飛，鬧過清遊正及時。  
春事到今難着語，鳥聲無奈只催詩。  
日烘花氣侵軒戶，風晃江光入酒卮。  
回意總將西子看，對山終日未成癡。

時冠之有只欠蛾眉把屈卮之句

### 狼山

裹了青衫簪了纓，此身便是一浮萍。  
五年客路春風熟，千里鄉關夜月明。  
華鶴歸來驚物變，白狼依舊逼人清。  
山中老宿爭迎我，輯杖相呼問甲庚。

### 龜山

當年王氣擁神州  
袞袞朝宗此地由  
自昔好山猶故色  
只今清泗漫安流  
蒼烟鎖合神仙府  
宿蘚封深魍魎囚  
病眼不堪重北望  
西風揮淚下扁舟

遊龜山

舟行十日困拘拳  
到此登臨意氣掀  
山斷蜂腰盤漢表  
水分燕尾入淮門  
石埋萬古英豪筆  
洞鎖千年魍魎魂  
懷昔感今無限意  
夕陽人去亂鴉翻

何家港捨舟步至新河口

潮來白浪卷平沙漸見菰蒲沒兩涯會欲燃犀鞭魍魎  
可能結網羨鱸鮓三千水擊鷗鵬上百萬軍行將士譁  
驚歎漁人何活計扁舟掀舞寄全家

聞嚴子文納妾孟守有詩輒次韻

春市笙歌興已闌  
儒宮牢落分投閒  
不知列屋傾城蔡  
自笑微官繫觸蠻  
赤脚有年供侍側  
青鸞無夢到人間  
傳聞謫墮行雲侶  
想像高唐鬢欲斑

挽太尉王權章

將軍名字著華戎，露甲曾收不戰功。  
馬革裹尸忠貫日，虎頭食肉氣如虹。  
雲屯欲倚金城重，星隕俄驚玉帳空。  
好象祁連築新塚，鼓鼙遺恨意何窮。

七言絕句二十首

送芋酥與宿齋三學士

酥盤薦酒迎春壽，芋火談禪數夜更。  
雲脚四垂天欲雪，為君兩計破愁城。

何家港捨舟步至新河口

夾岸蘆蒿障日微  
拍堤波浪濺人衣  
隔江喚得漁船過  
貫柳雙鱸自買歸

郭公勾喚鱖浮水  
閤客招要鷗上灘  
岸斷溪橫人不到

樹頭依約見桅竿

江岸有鳥名郭公漁人云此鳥一叫則鱖魚出

北岸行人南岸山  
去年人在亂山間  
山如相識須相笑

底事區區未得閒

余去冬行東陽下蜀

狼山

日日懷歸今得歸  
舊時風物未全非  
江邊鷗鳥應相笑

底事塵埃滿客衣

貪戀微官未得閒  
二年鄉夢遠狼山  
如今真箇山中去  
不是尋常杳靄間

行攜三尺虎臂杖  
歸飲十分魚枕蕉  
飲罷招船歌一曲  
馮夷亦合泣潛綃

夜靜無風水自波  
隔江燈火數陵坡  
消樽不屬今宵事  
奈此一江明月何

五載龍蟠虎踞間  
峯頭日月望狼山  
歸來筋力猶強健

野屐登臨莫厭艱

題得妙亭

行見山橫坐見縱  
山隨意好日無窮  
朝來爽氣誰能會  
渾在先生隱几中

探潮閣

天留孤嶽青冥約  
束淮流入汴京  
往事不堪回首望  
倚欄斜日看潮生

題避俗軒



地僻便知城市隔  
心清自愛水雲閒  
障塵不用西風扇  
香篆溟濛正下闌

題汗青軒

地禁官清靜不譁  
日長時試小團茶  
一生只用如椽筆  
細為君王紀正邪

大閱回馬口號

前驅小隊立元戎  
一點台星喜氣濃  
凱奏歸來鈴閣靜  
精神端已折遊衝

芸香亭

竹間當日一亭幽  
淪茗焚香向此留  
丹碧只今俱化出  
獨來戀戀憶前遊

密雲亭

落花搖曳水溶溶  
金現瓊綿世界容  
只恐水流雲不見  
桃源歸路却無蹤

傲霜亭

霜風吹慘入園林  
零落塔前滿地金  
賴有翠蕤堪採摘

伴人猶守歲寒心

丁亥歲予留建康夢登大橋仰視霄漢有金書  
閣字北斗落落布列其側昨夕夜直坐石渠橋  
忽見七星低昂正倚秘閣而金書大字儼然夢  
中所見信知世事皆有定分非偶然也

秘宇涵風寒淦淦虛廊侵月靜冥冥寶章玉座神深地  
應想誰何會百靈

青冥風露飛簷外黃道星辰企翼邊獨倚梧陰心自省

十年清夢故依然

枕上

輾轉孤燈夢不成  
念家憂國總關情  
月明定到棠梨上  
時有啁嘈格磔聲

欽定四庫全書

宮教集卷三

宋 崔敦禮 撰

樂章

太祖皇帝師次陳橋受天命協人情為聖皇武  
聖皇武愴顯幽震逾恭翼微周帝下顧民噢咻糜沸鼎  
汎橫流否其復飛龍秋挽天弧建神矛振汨陳過虔劉  
潸然施鴻祐休燠以濡羸者瘳御皇極凝前旒徧臚歡  
蕩岱丘

右聖皇武二十二句

劉銀僭號嶺南虐其民潘美伐之俘以獻為猛  
虎攫

猛虎攫噬海隅跨嶠綿嶺環為鑪流膏解節民畢屠帝  
怒惠顧思徃蘇授以旆將施天誅長驅無垠抵其郭手  
援炎敵吹以濡長纓繫頸來累累撐骸膾肉窮凶徒觀  
城告社咸嗟歎

右猛虎攫二十句

李煜不朝伐之煜降江南平為震雷薄矣

震雷薄矣胡蠅之營彌江負淮隩天險矣寧曰我盡臣  
度肅恭威靈宇宙混同一方阻皇明建靈旗下巨舳震  
威而懷靡事戕戮王師如翰至則速風瀟雷磕奄其覆  
哀哀逆儔維喙乞降標車青蓋朝帝鄉妖氛殺翳旋披  
攘膏痠腥臙德澤滂凱旋金聲奏洋洋輝燿萬國俱向  
方

右震雷薄矣二十八句

歌詞十四首

太白遠遊

太白遠遊者崔敦禮所作也太白在天寶間當高力士楊國忠之徒用事不能俛首以同俗浮遊四方浪跡自肆詠歌之際類多託配仙人與俱游戲周歷天下放意寥廓無所不至太白豈無意於世者憂思憤鬱假以自適其屈原遠遊之意歟敦禮遊當塗弔青山之墓因集其言彙括為楚詞命曰



太白遠遊云

人間不可以託兮

悲清秋

信長風而雲行

遊泰山

浩漫其將

何之兮

尋范居士

悵飄忽而徂征

淮陰書懷

天生材以有用兮

將進

酒思逢時而經綸

梁甫吟

苦恩疎而媒勞兮

答裴侍御

坐長歎

以撫膺

蜀道難

雞聚族以爭食兮鳳孤飛而無隣

鳴臯歌

瑤

草隱於深谷兮層丘蔽以蒼榛

古風

驂騑拳跼而不得食

兮蹇驢得志以鳴春

答友人

蝮蜺嘲龍兮魚目混珍嫫母

衣錦兮西施負薪

鳴臯歌

世道有此翻覆兮

感秋

誰察余之

堅貞

雪

塊獨處此幽默兮

鳴皋歌

乃龜息而虬蟠

孟少府書

不

曠蕩以縱適兮何拘攣以守常

大鵬賦

將倚劒乎天外兮

欲掛弓於扶桑

孟少府書

以空憊而為巢兮以虛無而為場

大鵬賦

運以大風之舉兮假以摩天之翔

楊右相書

前期浩乎

漫漫兮

敬亭山

浮四海而橫八荒

孟少府書

赤玉舄以東上兮

烟蒼蒼其逢山

古風

逢羽人於天門兮方瞳好其容顏遺

我書以鳥跡兮讀不閒而三嘆

遊泰山

偶然值乎青童兮

綠髮雙雙其雲髮笑我學仙之晚兮蹉跎凋乎朱顏

遊泰山

山玉女飄飄而下兮遺我以流霞之杯稽首拜而自媿

兮棄世何其悠哉

遊泰山

隨風恣其飄揚兮

古風

不知東走

之迷

贈范金卿

忽撫已而自笑兮

古風

問南登之路岐

瀟陵行

採

姹女於江華兮收河車於清溪

送權十一

卧香爐以餐霞兮

書懷窺石鏡而心清遙見仙人於綵雲兮把芙蓉於玉京

期汗漫於九垓兮接盧敖於太清

廬山謠

乘興任夫所適

兮敘舊鳴騶忽其西馳

送劉副使

裁若木於西海兮

上雲樂

採瓊

藥乎崑山

古風

揖叔卿於雲臺兮恍惚凌乎紫冥

古風

飲玉

漿於丹丘兮備洒掃以明星

西岳雲臺歌

赤松借予以白鹿

兮挾兩龍以相從

古風

傳秘訣於韓衆兮精誠與夫天通

登天柱石

西上既窮其登攀兮

登太皇峯

雲飄然而無心

酬王司馬

八

極可以神遊兮賦大鵬於北溟激三千以崛起兮向九

萬而迅征

大鵬賦

訪廣成於至道兮聞大塊之幽居掇玄

珠於赤水兮天下不知其所如

大獵

登雲霄以直上兮

南軒

松入無窮而遺形

登天柱石

騎日月而羽化兮翼鴛鸞而雲

行

敬亭山

出宇宙之寥廓兮

孟少府

扛閭闔之崢嶸

大鵬賦

戴

長雲之河車兮

飛龍引

十二樓與五城

書懷

登真朝於玉皇

兮

贈從弟

賜瓊漿以玉杯

古風

聽天語之察察兮

明堂賦

廓如

雲而天開

葉和尚讚

天地同乎枯槁兮

宋少府

生世如乎轉蓬

効古

君子化為猿鶴兮

古風

營營為何所求

兮雞鳴趨乎四闕

古風

十步而九太行兮

陞瓦屋山

世路多乎

險艱

古風

傳其語以銘骨兮

古風

永願辭於人間

望廬山

忽魂

悸以魄動兮

遊天姥

即歸路而長歎

獻當塗宰

轉天車於六龍

兮

贈裴十七

雲駢下而飄翩

春日行

風為馬兮霓為裳

遊天姥

靡

星旃兮

大臘賦

迴鸞車

遊天姥

燭龍銜光以照物兮列缺揮

鞭而啟途歛翳景以橫翥兮逆高天以下垂

大鵬賦

望四

海兮何漫漫

古風

長相思兮在長安

長相思

復長劔而歸來

兮

寄丹丘子

謁九重之天門

贈從弟

白日照吾之精誠兮

梁甫吟

效剖膽而輸肝

行路難

吐崢嶸之高論兮開浩蕩之奇言

大鵬賦

所謂代馬不思乎越兮越禽不戀乎燕

古風

流波思

其舊浦兮落葉墜於本根者也

謝赴行在表

太白招魂

太白招魂者崔敦禮所作也敦禮既作遠遊又念  
太白自知不容於時益傲放不羈以自昏穢時無  
宋玉不能作招魂之辭以復其精神而風其上徒  
於詠歌之際外陳四方之惡內述長安之盛憂時  
愛主有屈原大招之遺風吁其悲夫因集其言彙  
括為此語謂之太白招魂云

予為謫仙兮

憶賀監

薄遊人間

送張祖序

傲岸不諧兮

答友

世

路艱難

古風

折芳洲之瑤華兮

寄情人

採瓊藥入乎崑山

古風

愁長安之不見兮

登鳳臺

坐拂劍而長嘆

送竇司馬

魂一去而

欲斷兮與春風而飄揚

惜餘春賦

飄揚其竟何託兮

古風

造化

為之悲傷

古風

於是帝命巫陽

招魂辭

若有一人

愁陽春賦

神氣

黯然精魂飛散

李長史書

遲爾歸旋

送李

乃下招曰魂兮

歸徠無東無西無南無北此

大招辭

碧海之東長鯨瀆湧

不可以涉此

古有所思

揚波噴雲蔽天鬢鬣此

古風

齒若雪山

掛骨於其間此

公無渡河

歸徠

招魂辭

去無還此

遠別離

魂兮無

南

招魂辭

南山白額窮竒羆豸此牙若劍錯鬣如叢竿此



口吞及鋌目極捨櫓些

大獵賦

歸徠

招魂辭

飼豺虎些

古魂風

兮無西

招魂辭

西當太白橫絕峩嶻些地崩山摧天梯鈎

連些崢嶸崔嵬朝虎夕蛇些磨牙吮血殺人如麻些

蜀道

難

歸徠

招魂辭

行路難些

樂府

魂兮無北

招魂辭

北緣太行嶺

道峻盤些馬足蹶側車輪摧罔些氣毒劒戟嚴風裂裳

些

北上行

歸徠

招魂辭

北上苦些

北上行

魂兮歸來君無上天

些

招魂辭

天鼓砰訇雷震帝旁些投壺玉女笑開電光些

風雨之起倏爍晦冥些

梁父吟

犬吠九關殺人以憤其精

魂些書情歸徠招魂

天路何因些

司戶

魂兮歸徠君無下

此幽都些招魂

閉影潛魂

恨賦

遺迹九泉些

望瓦屋山

劍輪湯

鑊猛火熾然些

大鍾銘

疑山炎崑苦海滔天些

尊勝幢頌

歸徠

招魂

保吾生些

秋賦

魂兮歸徠

招魂

還故鄉些

古風

高樓甲

第連青山些

南都行

飛楹磊砢拱黃緣些雲楣橫綺桶攢

藥些皓壁晝朗朱蕙鮮些

明堂賦

金窓繡戶朱箔懸些

散花

樓魂兮歸徠招魂

列珍羞些

汪氏別集

月光素盤飯彫胡些

媪家魯酒琥珀紫錦魚些

酬中都小吏

白酒新熟黃雞肥些

別兒  
童

山盤秋蔬薦霜梨些

尋范居士

吳鹽如花皎白雪些

盤楊梅為君設些

梁國吟

魂兮歸徠

招魂辭

恣歡譁些

將進酒

南國美人芙蓉灼灼些

古風

洛浦宓妃飄飄飛雪些

感長春

千吳兒豔星月些

趙女辭

西施東鄰秀蛾眉些

古効

一笑雙

璧歌千金些

古風

琅玕綺食鴛鴦衾些

寄遠

博山爐中香火

沉些

陽叛兒

魂兮歸徠

招魂辭

醉壺觴些

早春

青娥對燭儼成

行些

贈江夏太守

玉童兩兩吹紫笙些

古風

佳人當牕彈鳴箏

些

春日

玉壺美酒清若空些看朱成碧顏始紅些

前有樽酒

連

呼五白行六博些

梁園吟

赤雞白狗賭梨栗些

行路難

半酣

呼鷹鳴鶴些

行行且游獵

金鞍龍馬花雪毛些霜劍切玉

明珠袍些

白馬篇

魂兮歸徠些

招魂辭

入長安些

東巡歌

清都玉

樹瑤臺春些

擬古

萬姓聚舞歌太平些

春日行

伐鼓槌鐘啟

重城些日照萬戶簪裾明些騎吹颯沓引公卿些

鼓吹入朝

曲白日紫暉運權衡些

古風

倒海凌山索月採蓀些

書情

質炳煥羅星旻些

古風

魂兮歸徠些

招魂辭

樂不可言些

飛龍引

亂曰長相思兮在長安絡緯秋啼兮金井欄

長相思

望夫

君兮安極我沉吟兮嘆息

賦劍歌

懷洞庭兮悲瀟湘

惜餘春賦

把瑤草兮思何堪念佳期兮莫展每為恨兮不淺

上同荷

花落兮江色秋秋風嫋嫋夜悠悠

悲清秋賦

魂兮歸徠

招魂辭

謝遠遊

江上秋懷

九序

九序者崔敦禮所作也敦禮居江東江東之民好祠信鬼有楚之遺風歌樂鼓舞獨無楚人悽惋之詞以侑祀事因訪其地作為九序之歌上以陳事

神之敬下以見修身行己之志云

春日兮繁鮮車闐闐兮句曲天絙瑟兮拊鼓滿芳菲兮  
瓊筵朝霞為羞兮沆瀣為醴瑤華玉饌兮錯襟而陳前  
靈之來兮赤城空駕白鶴兮御清風羣仙從兮哆哆雲  
暎曖兮車隆隆靈之去兮返太清騎日月兮朝紫皇下  
視九州兮塵泱茫五嶽俎豆兮四溟杯觴製瓊琚兮余  
衣集芳蓀兮余裳荷佩兮離離蘭旌兮揚揚欲往從兮  
未得望夫君兮彷徨

正曜

若有人兮水中央  
魚鱗衣兮白蜺裳  
荃橈兮桂旗欲女  
迎兮風薄之神之駕兮  
兩龍駢白龜兮蛟螭從朝  
余陟兮三山夕濟兮牛渚  
神不來兮夷猶使我心兮  
苦復苦濯纓兮姑溪結佩兮  
采石誠不已兮幽通信不墜兮  
物格若有臨兮風颺颺作  
莫雨兮愁江臯神交兮意  
接來不言兮去無迹  
倏雨歇兮雲收山青青兮  
水悠悠

華陽洞天

雲冥冥兮疊嶂君獨立兮山之上石嶮險兮水道寒思  
夫君兮未敢言無言兮皇皇山阿之人兮告我以不難  
木樛蔚兮下俯石避礙兮行旁余冠兮巍巍余步兮逶  
遲俛首非吾之願兮斜徑其將安之朝騁望兮昭亭夕  
宿兮雙溪網蕙菑兮為蓋葺蓀蘅兮為車欲騰駕兮高  
翔恍導余兮上躋揭北斗兮奠椒漿簸南箕兮羞瓊藥  
靈欣欣兮顧余亶正直兮為神予

中水府



汎汎兮吾舟沛吾乘兮東流東流兮何之有美人兮天  
一涯烟杳杳兮南徐雲連連兮北固海何為兮清明江  
何為兮流注彼美人兮山之曲鎮龍闕兮轉陰軸約束  
海若兮呵水馮夏不苦雨兮冬不疾風汙邪穰穰兮海  
沂阜豐我民報事兮罔有不恭采秀實兮山巔擷芳馨  
兮澗底霜私兮水芒蕙肴羞兮椒精神之格兮樂享惚  
蜿蜿兮來止

下水府

鍾山萃兮江之湄葯為祀兮辛夷祠神乘白馬兮執素  
羽朝與日出兮莫雲歸噫嗟兮明神烈烈兮用光生乎  
疾盜兮奮不顧死死焉助順兮赫然發靈湛清尊兮明  
水揚玉桴兮扣雷鼓扣鼓兮如何我欲言兮淚滂沱憤  
有妖兮蟠中土雜蘅臯兮穢蘭宇豺豕兮人居猘獠兮  
室廬願神我福兮我祥舉長矢兮射天狼使河洛兮回  
波令岱華兮還光山蒼蒼兮水湯湯神之威兮儼不忘  
剗肝為辭兮瀝血陳神之聽兮聞不聞

田間辭三首

朝余往兮東疇景翳翳兮雲油油牛驅耕兮載泥重鞭  
不前兮挽犁用歲云暮兮暮維何倉庾鳴兮布穀和疾  
吾耜兮固吾耒趣甘澤兮及時播

我耕兮我田雨浪浪兮雷填填水漫漫兮種不下出門  
見水兮淚滂沱惠我晴兮疾耕而耨螟敗之兮穎弗得  
秀嗚呼我無時違兮時不我予時不予兮奈何蹇無忘  
兮吾事

數稻兮登場牽牛兮入屋噉咷兮田家歡迎兮稚子三  
年力耕兮今逢年庾則實兮庖有鮮草藉兮陶盤幽吹  
兮土鼓握牛兮誰歌和之兮余舞樂復樂兮歲晏冰雪  
集兮堂下時疊疊兮不再蓀何為兮田野

北山之英

強敵驕兮晉多壘忽登山兮望廷尉風霾兮殺氣昏突  
槍柵兮亂鈎陳予君麾兮從君鉞戰陵西兮捍溪柵虹  
食壘兮火焚旂公之死兮去如歸公有子兮憤爭先勇

没地兮羞戴天父死忠兮子死孝令名揚兮日月照物  
有始兮豈無終得所歸兮孰如公喜幸生兮畏義死語昵  
昵兮顧妻子草木盡兮糞土委聞高風兮汗流趾

楚州龍廟迎享送神辭

紹興辛巳金人嘗以銳師樓船蔽海而下欲以奇  
襲我將臣李寶受命迎拒既下海即沉牲醑酒禱  
龍神而行事還具上神之詭異以請於朝天子既  
推功不居報禮上下則惟有神之功厥尤彰灼下

其事淮南漕司擇傅海地建廟乙丑三月楚州鹽  
城縣告廟成漕當以上命往祭某既以漕檄為文  
又私自作迎享送神辭三章遺縣令使歲時歌以  
祀之

君之來兮殊廷雷隆隆兮雨冥冥從天吳兮罔象紛萬  
怪兮如雲若有物兮震奔沛吹逆浪兮揚回旌授天矛  
兮下討披蒙霧兮祥氛地平天靜兮日月清明我民蒙  
福兮萬年報裡

辛楣兮葯房蘭枿兮桂楹翼翼兮新宮穆將進兮芳馨  
栢實兮松液芝華兮若英奠瓊筭兮清醑玉俎折兮嘉  
牲雅聲兮遠紹鏘和平兮鼓鐘紛繁會兮竽笙靈連蜷  
兮須搖儻暗藹兮紛紜潔我心兮恭事靈欣欣兮燕寧  
君之去兮朱宮乘飛雲兮御迴風貝闕兮豐敞金臺鬱  
兮穹隆珠胎兮炫耀周玉樹兮青葱天琛兮水碧衆寶  
萃兮玲瓏良辰兮高燕命馮夷兮展舞陽侯兮海童羣  
仙兮啟路君肯臨兮尚春容君不我留兮我心忡忡紬

清思兮幼眇惠我民兮盡終

詩餘六首

壽詞

柳梢青

驚世文章門戶照人外家衣鉢多謝溫存相期宅相此  
恩難說 今朝祝壽樽前共拜舞諸孫下列但願從今  
一年強似一年時節

壽詞

西江月

暖日江南梅柳春風堂上笙歌滿斟醺醖笑聲譁再拜



千年壽嘏 清健非緣服玉紅顏不是蒼霞仙姿福祿  
自無涯要看滄溟綠野

時夫人壽

鷓鴣天

本是瑤臺月裏仙笑麾鸞鶴住人間蟠桃一熟三千歲  
刺對春風日月間 縹緲結綵衣斑孫枝相應傍門關  
年年同上長生酒得見滄溟幾度乾

王母瑤池景物鮮蟠桃華實不知年天教把定春風笑  
來作人間長壽仙 披縑笈誦雲篇朝朝香火篆爐烟

只將清靜為真樂，合住春秋歲八千。

和徐尉

念奴嬌

吳淞江畔對烟波，浩渺相忘鷗鳥。日日籃輿湖上路，十里珠簾驚笑。高下樓臺淺深溪塢，著此香山老。輞川圖上好風吹夢，曾到不用金谷繁華。碧城修竹自比封君號，萬壑千巖天付與。一洗寒酸郊島霖雨，方思烟塵未掃。合挽三江倒，功名遂却來依舊華表。

垂虹橋亭詞

水調歌頭


倚權太湖畔踏月上垂虹銀濤萬頃無際渺渺欲浮空  
為問瀛洲何在我欲騎鯨歸去揮手謝塵籠未得世緣  
了佳處且從容 飲湖光披曉月抹春風平生豪氣安  
用江海興無窮身在冰壺千里獨倚朱欄一嘯驚起睡  
中龍此樂豈多得歸去莫匆匆

送凌靜之

江神  
子

吳王臺上雨初晴遠烟橫柳如雲門外西風催踏馬蹄  
塵聲斷陽關人去遮落日向西秦 不教容易縱歸程

語酸辛黯消魂且共一樽相屬莫辭頻後夜月明千里  
隔君憶我我思君



欽定四庫全書

集部  
宮教集卷  
四至  
六

詳校官 庶吉士 臣 翁樹培

主事 臣 呂雲棟 覆勘

騰錄監生 臣 汪 葆

騰錄監生 臣 徐元秀

騰錄監生 臣 馮克鞏

欽定四庫全書

宮教集卷四

宋 崔敦禮 撰

表二十五首

進經筵徹章詩表

聖治崇文遠稽先訓經筵進讀荐及終篇慶千載之昌  
期昭一時之殊遇敢形歌詠用侈恩榮中謝臣等伏以  
皇家開久大之基章聖龔隆平之業瀟澗振凱秦嶽升  
中治定功成光於前烈憂深思遠啟我後人爰集要言

是成正說永思厥道咸聚此書臣等胥荷簡知並參親  
近絳袍中御瞻康色之咨詢錦几前陳罄微言之綉繹  
適緣幸會遂畢華編講天聖之曠儀舉紹興之盛禮諸  
儒拱侍四近環觀旨酒嘉肴退集蓬山之燕名香異茗  
出頒御府之竒既均厚於眷慈復第分於寵錫象簡稱  
橫金之貴珍奩加瑞石之良捐以名駒被之沃轡恩施  
一日風動四方茲蓋恭遇皇帝陛下神智旁通天仁安  
運聲色玩好無所貳其心欽明文思不忘典於學載周

簡冊僅閱歲時彼漢世之召公卿但聞於稱引越唐朝  
之選者碩姑備於闕疑歷攷前聞莫逾今日於穆不已  
厥修乃來臣等俯愧淺聞仰承異眷拜陳庭之賜共欣  
儒術之逢辰誦報上之章各効忠臣之歸美

賀皇帝登極表

虔奉慈謀嗣登大寶文王孫子罔不或承高廟神靈云  
胡不喜中賀皇帝陛下仁孝恭儉率履清躬神聖文武  
一似藝祖膺上皇主鬯之重積兆庶繫心之勤於昭於



天乃命以位功盛德厚居帝位惟允宜仁滂澤洋與海內  
且更始臣叨逾徧郡際會昌辰北面覲而東面朝阻陪  
末序西向三而南向再欽想盛容

會慶節賀表

鳴社開祥千齡有赫呼嵩請祝九宇同寅中賀恭惟皇  
帝陛下濬哲生知聖明天縱建中立極能保惠於庶民  
申命用休俾緝熙於純嘏星虹紀旦日月增華臣仰誤  
隆知叨分望郡百福千祿但歌周雅之篇萬壽稱觴阻

預漢庭之列

會慶節賀表

天佑民而作之君祥肇開於甲觀臣歸美以報其上祝  
敢效於華封丕昭星渚之休恭致露囊之獻中賀恭惟  
皇帝陛下英謀天縱聖德日躋協帝重華繼離明而布  
照握樞臨極主震器以居尊宗社儲禧臣民溢喜指南  
山而共祝望北闕以歡呼臣弭節江干馳誠天陛干官  
班後阻瞻龍衮之光萬歲聲中遐想鳳樓之曉

會慶節賀表

紫樞旋電丕煥昌辰金鑑封章敷同善頌後璿穹而貢  
祉包輿地以儲禧中賀恭惟皇帝陛下智勇自天英明冠  
古體元出震萬物覩而風雲從立極乘離四時行而日  
月照光鴻圖而增熾履慶序以叢休臣謬領州符欣逢  
聖旦五百里侯甸參鼇抃以無階八千歲春秋睇日升  
而介壽

會慶節賀表

穹昊儲休丕煥紫樞之瑞聖神接統有開赤伏之祥彌  
月斯臨際天共慶中賀恭惟皇帝陛下離明布政乾健  
凝圖總壹權綱宣大猷而執競奮熙憲度體皇極以建  
中慶緒光華靈祺紛郁臣誤膺隆眷出典近藩奉萬年  
之觴阻與清班之末獻千秋之鑑但祈神災之增

會慶節賀表

藝祖開基七世啟雲孫之聖上皇與子兩丁熾火德之  
祥紹二帝之昌圖僕萬年之景命恭惟皇帝陛下龍飛

首出虎變文昭鍾三光五嶽之靈膺千載一時之運雷  
電而感高祖夙彰幽顯之神交天日而表太宗足使英  
雄之膽落即正神州之御永嚴太極之尊臣身留萬國之  
西目遡九霄之上生聖人而為主雖諧夜禱之誠對天  
子以揚休莫預昕朝之慶

天申節賀表

寶殿奉卮喜際流虹之旦露囊獻壽用伸呼嶽之誠中  
賀恭惟太上皇帝陛下道大難名功成不有怡神昭曠凝

宇定之天光觀妙希夷收雷聲於淵默後乾坤而貢社  
括海岱以叢禧臣謬領使軺欣逢誕節四方來賀獲陪  
特室之朝萬壽無疆恭致封人之祝

天申節賀表

玉卮介壽仰天子之有尊金鑑披章劾封人之請祝乾  
坤隕祉宇縣臚歡中賀恭惟太上皇帝陛下甄陶商周  
糠粃堯舜凝神昭曠道蕩蕩以難名觀妙希夷孰敞敞  
而為事安受珠宮之奉坐膺神筴之增臣叨守輔藩欣

逢誕節五百里之侯旬朝特室以無階八千歲為春秋  
企中嵩而呼壽

天申節賀表

漢殿奉卮欣際千齡之盛堯封祝聖用伸萬壽之祈中  
賀恭惟太上皇帝陛下觀妙希夷凝神昭曠功成不有  
退安特室之遊道大難名誕播康衢之詠塞乾淵而寢  
福括海岱以叢禧臣叨領使軺獲逢聖旦崆峒得道固  
莫測於修齡嵩嶽傳呼徒有勤於善頌

謝賜夏藥表

炎熇流金重軫乘邊之士名方飛雪遽頒解愠之仁祇  
服閔勞頓忘憚暑中謝伏念臣等職當汗馬志在飲冰  
屬疆事之晏寧不聞侵鎬樂軍書之清靜無復渡瀘陳  
力已羞記存何幸茲蓋恭遇皇帝陛下翦鬚義重蔭樾  
恩均燕御高明方理熏琴之化顧嗟戎役不私水殿之  
涼靈劑一頒清風四襲臣敢不推揚德意訓厲師徒水  
居而蝮蠱生時難亡於暴武穴處而爲跼墮志終願於



裹尸

代平江魏丞相謝賜銀合夏藥表

三伏炎曦屬謹侯邦之職萬金良劑遽頒御府之珍祇  
服閔勞頓忘憚暑中謝伏念臣奮身寒苦遭世清平報  
荅隆知志有飲冰之節僥逾高位功無汗竹之書茲分  
牧於輔藩庶奉揚於德化敢緣歆鬱重軫慈憐茲蓋恭  
遇皇帝陛下蔭越覆民熏琴阜物含風晝永靡私殿閣  
之涼扇暘仁均曲記廟堂之舊名品寵頒於飛雪湛思

深決於零蕭臣發驛端披啟奩下拜簿書叢委坐消決  
背之煩條教簡稀用底清心之治

吏部進新修七司條令表

選部成書備正七司之典丹書奏御仰塵乙夜之觀重  
冒聰聞冀垂睿鑒竊以總三銓之流品最為業鉅而事  
叢示萬世之憲章必也法全而令具屬此承平之久紛  
然建請之煩千門萬戶而吏得出入其間玩歲愒時而  
士多睥睨於此當上聖解紆而更化俾下臣秉筆以裁

規討論潤色咸竭其勞簡要清通庶行於久深斥聖書之陋謾希姓厯之修陛下躬攬權綱兼總條貫月成月要明八柄以馭臣官法官常揭九章而布治臣仰憑成筭僅及終篇蕭何規而曹參隨當共遵於先矩神龍紊而開元理將高掩於前猷

代江東漕臣賀皇帝降嫡皇孫表

皇穹錫羨式彰保佑之休朱邸發祥遂啟衆多之慶凡居覆載孰不欣愉中賀臣聞侍膳問安於周文而專美

宜民受祿在成王而獨隆未有方躬孝養之勤而乃已  
見燕貽之盛恭惟皇帝陛下繼明離照協帝重華蕩蕩  
巍巍光紹配天之業皇皇穆穆遂開磐石之宗臣喜際  
休嘉惟勤祝頌不顯亦世子孫更茂於億千於萬斯年  
歷數豈惟於八百

代江東漕臣賀太上皇帝表

殊宮引養受帝祉以方隆奕世蒙休詒孫謀而益遠事  
闕廟社喜溢人神中賀臣聞男子之祥實曰人間之喜

曾孫之慶尤為聖祚之光在亘古以未聞於今時而乃見恭惟太上皇帝陛下道參盛帝德冒生民獨高揖遜之風浸衍延洪之福熾而昌昌而熾膺壽考之萬年孫生子子生孫暢本支之百世臣欣逢盛事阻造賀班瓜瓞方綿坐看雲來之慶蘿圖有永卜知年世之長

代平江守臣賀淳熙改元表

升禋泰峙具輯神釐渙汗端門載新年紀邦圖增固海縣均歡中賀恭惟皇帝陛下睿智日躋聖明天縱昭受

三靈之貺規恢奕世之基發號更元冠鴻名而有赫同  
文布政垂寶厯以無疆臣叨守近藩欣逢盛際奉三朝  
之圖藉阻預進趨法五始於春秋惟勤頌詠

代浙西倉使賀淳熙改元表

聖運凝休丕揚光烈王正謹始肇易鴻名極載疇以同  
文絕古今而冠美中賀恭惟皇帝陛下離明繼照乾健  
當天居正體元總權綱而執競宅中圖大宏祖業以重  
光爰因歲號之更用布皇猷之煥臣誤將隆旨欣際昌

辰過於七百年豫卜周基之永不以一二數竊瞻漢歷  
之新

代平江守臣謝上表

理寺祥刑偶寬譴斥輔藩擇守遽被俞咨惟郡劇而材  
踈且人凡而地要任非所稱榮不盖慚中謝伏念臣智  
識庸虛藝能短淺沉迷州縣徒閱歲時揚歷班行莫裨  
塵露謂棄捐之已晚曷選用之敢希况所領州實為會  
府無窮之費何翅於漏卮有盡之藏幾同於垂罄士亡

繼廩師乏見糧正須經畫之規上釋焦勞之慮豈臣愚  
慙足備簡求恭遇皇帝陛下盛德溥臨至明旁燭知臣  
早親於吏事粗達民情謂臣久次於卿曹靡干官謗爰  
膺眷記擢畀煩難臣敢不策勵駑疲勉思夙夜赴功趨  
事庶興頽弊之風足用愛民謹布寬平之政

代平江守臣謝賜御書戒飭手詔碑本表

誕布綸音竦風雷之鼓舞載頌寶墨仰雲漢之昭回拜  
賜知榮窺文增懼中謝臣聞易儆有位邦用輯寧周迪



厥官民其康乂眷言治本允繫士風惟習尚之既淳斯  
事功之克建恭惟皇帝陛下離明布政乾健御天摠攬  
權綱將丕凝於庶績細書詔札用申飭於羣工刻琬琰  
以無窮垂日星而有爛河圖洛書孰窺宸翰之精周誥  
商盤咸誦王言之大臣濫膺寄委與被恩班佩服終身  
誓竭駑駘之力珍藏十襲豈徒篋笥之光

代浙西倉使謝御書戒飭手詔碑本表

叨持星節方披九地之圖寵拜雲章祇奉十愆之戒觀

瞻榮耀伏讀凌兢中謝臣聞易俗移風聖神之能事視  
儀聽唱臣子之至情屬茲積弊之乖上軫焦心之念出  
絲綸之命具播於堯言刻琬琰之文載均於周賚凡居  
厥位罔或不勤恭遇皇帝陛下離照當天乾剛布政茂  
建非常之業大明責實之方一札細書儆於有位百辟  
卿士各黜乃心期益勵於官箴更榮分於寶軸窺文增  
竦振鼓舞於雷風傳玩無窮燦光華於奎壁臣濫司澄  
按與被恩頒佩服終身誓竭駑駘之報珍藏什襲豈惟

篋笥之光

代謝賜歷日表

課驗疇人書成太史更程時叙得先後天之宜紬繹日  
分正大小餘之次吏因作事民獲趨功中謝恭惟皇帝  
陛下統輯化工混齊政紀誕膺神策合四千歲之上元  
綜覆清臺定八百年之差日緝熙昭度宣布同文臣敢  
不動靜稽參夙宵祇奉按圖識候知春秋晦朔之期虔  
詔勞農授夷隩析因之叙

代謝賜厯日表

啟驛端披奉書下拜具知早晚罔失初常中謝臣聞堯  
定四時欽于厯象舜齊七政審厥璣衡惟氣叙之無訛  
斯民宜之允協恭惟皇帝陛下撫辰凝治作極體元後  
天而奉天默存輔相底日不失日用謹候程爰頒告朔  
之文式致授人之敬臣逢時用夏率賦頒春遵以務農  
不爽竊脂之候順而作事自消伏蟄之凝

代謝賜厯日表

歲籥方春歷書頒朔式謹王正之始具昭民事之宜下  
拜知榮仰承惟恪中謝恭惟皇帝陛下撫辰凝治作極  
體元後天而奉天道默存於輔相底日不失日叙必正  
於初常爰分命於庶邦俾咸遵於丕則臣敢不夙宵深  
考動靜詳觀宣化難窮雖自慚於已學詔條恭布當申  
飭於農功

代陳丞相郊恩加食邑實封表

泰壇高燎丕薦明禋允澤旁流式均大慶褒嘉所暨震

懼為深中謝伏念臣遭際非常進登踰分歲月已晚無  
薄効之可論夙夜靡遑念隆恩之未報方滌牲而祇事  
屬懷綬以載行旅幣獻球莫修於貢入奉璋執豆阻與  
於駿奔迨熙事之備成乃鴻恩之誤及增封衍食疊寵  
駢休此蓋恭遇皇帝陛下功格乾坤誠通幽顯聖能饗  
帝既並貺於三靈福用錫民俾均歡於四表敢期芻豢  
亦昇微軀自省無勞尚媿翟閭之後莫知圖稱獨殫犬  
馬之恩

代建康陳丞相乞致仕表

頃上囊封深期得謝仰膺綸詔遽俾斷章既感戀於恩私乃因循於時叙不勝衰羸之疾再伸危迫之誠中謝伏念臣猥以庸才出逢休運周旋中外曾無毫髮之功荏苒年齡已迫桑榆之景老將疾而偕至神與力以俱殫所宜待盡於窮閻詎得過尸於榮祿昨披悃幅願上印章乃煩訓諭之溫曲示撫存之厚雖恩慈廣大未忍棄捐而灾病侵陵實難強勉近從新歲益困舊痾形骨

支離幾同於槁木視瞻茫昧但見於昏花進趨愈覺於  
龍鍾思慮多成於廢忘藩維寄重豈疲茶之能勝管鑰  
任嚴非耄衰之宜處儻不求於休謝必將速於顛躋載  
惟古者告老之臣本以心存知足之義迹深嫌於避事  
志切戒以沽名幸此安平固匪辭難而欲去有如朽憊  
自甘沒世以無聞惟思反於丘園庶少延於喘息伏望  
皇帝陛下仁深惻隱明燭幽微憫其垂盡之年久嬰衰  
疾察此再三之懇誠匪虛文特頒渙汗之恩俯遂乞骸



之請俾得優游晚節涵泳聖時終全畎畝之餘生永荷  
乾坤之大造其為榮幸曷究敷陳

賤三首

代江東漕臣賀太上皇后賤

母道夙隆克膺多福慶流浸遠誕育曾孫喜溢兩宮歡  
均萬宇中賀恭惟太上皇后殿下躬行柔順德備謙恭  
播太任之徽音神無恫怨鍾文王之孫子國茂本支閱  
茲四世之休相乃萬年之祚臣屬將使指莫造外朝朱

帝斯皇想動慈顏之悅景命有僕永觀丕緒之光

代江東漕臣賀皇后牋

蘭殿椒房夙深積慶金枝玉葉有衍儲休中賀恭惟皇  
后殿下昭示母儀順修陰教德嘉嬪於媯汭祥襲慶  
於文孫浸隆盛大之基益固靈長之祚臣屬持使節阻  
造外廷詠采芣之詩化已成於和樂誦螽斯之什福更  
享於衆多

代平江守到任謝東宮牋

九棘平反已汙近列一麾分牧復玷名藩祇荷寵靈惟  
深戰懼伏念某藝能謏薄智術迂踈頃備屬於南衙獲  
承顏於東禁浩穰天邑裨贊何功登進月卿僥踰已甚  
敢意思綸之誤更紆郡紱之榮揣涯分以曷勝仰生成  
之有自茲蓋恭遇皇太子殿下稟資玉裕毓粹淵沖煥  
輝潤以照人體溫文而接物有如庸妄亦荷眷私某敢  
不奮勵厥心恪勤所事磨鉛策蹇雖自歎於拙艱濟劇  
撥煩願少圖於報効

欽定四庫全書

宮教集卷五

宋 崔敦禮 撰

劄子十五首

進重刪定呂祖謙所編文鑑劄子

臣昨蒙宣引奏事令臣刪定呂祖謙所編文鑑奏疏八冊臣學術荒踈仰被聖訓不敢不竭愚誠今已刪定了畢其元降出本一一貼黃聲說所以刪去與增添却重別繕寫淨本八冊進呈但本朝繼五代之後其始文字

未遽純粹難以求備又不可無以充一代之言如國初  
臣僚是也至如名在當世號稱直臣言雖有疑不可登  
載亦不可無聊以備一人之作如鄒浩之類是也大率  
本朝自仁宗以後開廣言路於是鯁言讜論表表愈偉  
臣今於元降出本內取其緩而不切者刪之別撫要而  
有體者增之至於一篇之內時有難於傳後之辭難以  
小疵遂害全篇不免參校刷本有所刪除及其間脫錯  
亦一一改定悉已貼黃聲說臣雖罄其區區大懼智識

淺短不能仰副聖意所有元降出本冊謹隨劄子上進  
仰乞睿察

代乞罷總司市易劄子

臣竊惟國家財用養兵之費居什七陛下天姿智勇規  
恢遠圖所以優恤卒伍者甚軫聖慮近以沿江諸屯軍  
士有口累猥衆不能自贍者特降緡錢每總司二十萬  
俾之市易以歲入之息分給之甚大惠也夫商賈之逐  
利不過什一今緡錢二十萬回易歲責十萬則是五分

之息夫以縣官二十萬緡而資以總所之權藉以養軍之說市廛列肆車運舟載凡民間有一孔之利其勢可得者必籠而取之州縣不敢禁闕征不可呵鼠雀之蠹侵牟公家之物並緣之姦漁奪商賈之利所在場務課額率皆虧損州縣往往督責又故為苛留巧取百端道途怨嗟商賈幾於不行臣甚為朝廷惜之臣姑以淮西所見者計之若總司以歲所收十萬之息盡行給散建康及司馬兩軍亡慮七八萬人多者所得不下二三緡

少不過千錢得之者既微未足為惠而不得者寧無怨言所謂不患寡而患不均也夫結軍士之心有義有利二者要並行而不廢利以養其身義以服其心古人固有投醪於河俾士卒同流而飲蓋欲其均及之也楚師多寒主巡而拊之三軍之士皆如挾纊此以義感之也如聞今次所散贍給之金絕微以朝廷黃榜措置使此曹終歲望之而所得止此此所以不能服其心也仰惟陛下躬履節儉聲色不邇貨利不殖凡為帑藏之儲以



備軍需結士心且所願豈與商賈細民計較區區小利哉臣愚欲望聖慈詳酌罷去總司回易一事以便民旅仍乞斷自宸衷出御府之金令江上諸屯之軍每歲或間歲大閱一次松江兵屯有五多寡不同多者捐五六萬緡俾以其半為教閱激犒之費以其半給口累之衆者如此則人人皆沾其賜雖所得不多亦且均平有以服其心也況今日楮幣流行江淮之間不重見鏹而重交子至有堆積見錢以買交子惟恐不得者如臣所陳

陛下不過歲捐三十萬交子則霑然矣豈惟名正而惠周可以振士氣而數路細民商賈不至失業寔受不貲之賜也取進止

論立法制劄子

臣竊惟立國之權惟法度政令而已祖宗之法度要使天下遵之而不敢議人主之政令要使天下信之而不敢疑若夫因一事而立一法因一人而勅一令則天下竊議而人心益疑矣仰惟陛下剛健出於天縱宏規遠

畧冠古未有甚盛德也然比年以來祖宗舊法或變於小臣之獻言而朝廷出令或徇於一夫之私意為之特降指揮如此等類不勝其多臣姑以到江東所見一二言之夫巡轄遞鋪自有司存若其稽遲行法可也今乃因有闕誤特令守倅入銜夫州郡之事孰非隸守倅者可盡入銜乎此亦未免為文具也豈非因一事而立一法乎路分鈐轄與轉運判官提舉前於茶鹽官著在乾道新書所至未嘗不遵守今忽特降指揮申明如此則

乾道一書每事皆當降指揮然後遵守何其繁也豈非  
因一人而下一令乎此特其小者猶未至於害政也至  
於兵戎之職各有臨制階級自都總管而下又有副總  
管又有路鈐轄路分都監亦猶諸軍之有都統制副都  
統統制統領之屬今許路鈐轄因訓練得專奏則諸路  
副總管路分都監及諸軍統制統領苟有為之地者皆  
當援例而降指揮矣平居無事未計利害緩急之際軍  
政不一豈不乖亂況其間挾勢妄作之人必至率意生事

帥臣不敗號令監司不敗誰何紊亂常制莫甚於此此  
令一下輿議譴然知必有謂良由結交植黨苟相崇重  
欺罔聖聰變亂法制充其類而長之將何所不至外議  
以為權要近習有主其人者臣在遠方不得而知但觀  
近數年凡權要近習所主之人所立之事號令一出無  
敢執違論駁者而士大夫頹望如此豈不負國昔趙充  
國有言吾年老矣不以餘命為國家言之誰當言者况  
臣蒙恩最厚非充國比年將七十方欲乞骸以歸若隱

默不言徒與天下竊議寔負陛下伏望斷自宸衷自今  
以往凡小臣獻說必察其所由來詳之慎之毋輕立法  
凡朝廷出令必合天下之公心毋徇一夫之私意俾天  
下咸知王言之大王心之一則綏先王之祿底蒸民之  
心端自此也臣無任惓惓

奏論教化劄子

臣聞民俗之厚薄關於天下之治亂堯舜之民比屋皆  
可封也所以為治朝桀紂之民比屋皆可誅也所以為

亂世自昔聖帝明王所以移風易俗以壽天下之脉知夫不可以法防而禁止於是一以教化為先暨秦漢以來風俗益弊而時君世主不務崇尚教化方區區於法禁之間法愈繁而姦愈生禁愈密而詐愈出是以董仲舒王吉之徒始推原所自而以教化不修為言竊觀文帝之世一以君子長者之道待天下鎮之以淵默示之以淳朴用能海內富庶興於禮義斷獄數百幾致刑措教化之效詎不已然乎臣仰惟陛下勤儉之德仁孝之

資尚忠厚以迪民彝崇樸素以先天下是以四海之民  
觀感而化悉趨於善然而比年以來民俗日薄閭閻之  
內田野之間習囂囂頑庸之態扇乖爭陵犯之風以疾  
視為常情以讎殺為美事及其極弊至于滅人情絕天  
理不可勝言漢魏相所謂今年子弟殺父兄妻殺夫以  
為非小變者此之謂也而士大夫循習為常恬不為怪  
蓋病在腹心發見於外已非美證而顧以為緩豈不戾  
歟雖然近民之官無如郡守上之所使以承流宣化風



俗不善宜責於此臣伏望睿慈發德音下明詔俾四方  
長吏頗以教化為務鄉射食饗之禮可舉者舉之孝友  
睦婣之俗可旌者旌之要不專於法禁而務以移風易  
俗使民回心而鄉道茲至治之本也且昔之為郡其民  
有為不善則閉閣自責今使陛下之長吏人人各以風  
俗為任則陛下之民其有不歸於善者乎惟聖意留神  
幸甚

代陳丞相乞住罷白劄施行事劄子

臣待罪帥藩職事之外年老識昏每恨無以仰裨聖德  
敢因近事輒効愚忠竊聞號令出於人主行於朝廷布  
於中外古今天下之所同也間有軍國機密之事或慮  
行遣稽緩則自御前批降指揮用寶行下此所以今天  
下信而不容偽也未聞有內臣或都承旨司數百里外  
以白劄傳旨處分事者臣自到任以來一年又半矣凡  
三次被受指揮皆是白劄其一發北來人王濟等送都  
統司支破請受其一催勦楊百寧侵用官綱其一今次

天申節斷屠事臣各已遵依施行矣此三事者非甚機  
密之事若付省部行下何所不可夫省部行移則有印  
御前批降則有寶其文書可驗其經由可攷天下無得  
而疑者舍此而用白劄雖是小事無甚利害臣之愚慮  
竊慮白劄既信於天下則他時緩急有支降錢物調發  
軍馬處置邊徼干國家大利害等事既是地遠其勢不  
得覆奏又所取遵依狀止令付差來人回或申元承受  
去處其間詐偽豈可盡防若嚴重知體之人必至奏審

則往來之間遂失事機若繆懦無識之人耳目習熟以  
為當然即便施行豈不誤事又文字或不附遞差使臣  
虞候賫送所至妄自張皇頗有驚動官吏奉之如奉勅  
使犒勞僕馬饋遺酒食之費有至二三百千者州郡如  
此其他可知兼又訪聞諸軍將佐或總領諸司及兩淮  
州郡時時有之如此實於朝廷事體非便亦有外方施  
行之事而朝廷不預知者萬一詐偽決至誤事悔無所  
及大率姦民巧詐如度牒交子茶鹽鈔引之類猶能偽

為况此白批幅紙豈難撰造使其姦細容心於其間當不止脫漏饋遺而已也臣愚欲望聖慈自今以後在外有合處分之事乞從御前批降或從省部行下庶幾號令信確人不致疑而于事體甚正異時緩急不至誤事天下幸甚

代江東帥臣亢旱乞米賑糶劄子

臣等近以江東一路亢旱依準七月二十五日御筆指揮預講救荒之政臣等商量別無長策惟州縣鎮市鄉

村之間有米可糴則飢民不至流移已措置那簇錢會  
分頭差官於得熟州軍收糴尚慮道路遙遠米到遲緩  
及多寡有無殊未可必遂於前月二十一日具奏仰干  
聖造乞於椿積見在米內兌借米三十萬石穀二十萬  
石應副分散諸州縣賑糴今月三日准尚書省劄子奉  
聖旨候見災傷人戶實數別具聞奏臣等有以見陛下  
軫念飢民俯賜允從之意然尚有愚見須至再冒宸聰  
竊緣江東九郡其間只太平一州圩田頗熟信州或望

半收其餘皆已申到或云損及七分或云損及九分以  
上臣等體訪諸州相乘除大約通一路損及六分以上  
其間州郡亦已有申稱緣旱禾無收民間見今闕食乞  
行賑糶者今若候諸州差官檢到實損分數攢造支賬  
須是十一月初間才得圓備自此申奏待報及得報之  
後方敢斟酌多少輕重以分撥數目又取會諸司有米  
所在通融兌便以省般運之費或有地里僻遠及水路  
不通去處未免差雇舟船車腳往返之間動是一兩月

即見冬深民多流移救之無及臣等竊見目今人情皇  
皇若速得回降指揮雖未及分撥即先次散給小榜具宣  
陛下憂恤飢荒借兌米穀之意俾民間曉然知所感戴  
聖恩免起流離之念兼椿積之米間有乾道二年收糴  
者經隔十餘年亦恐愈益陳腐不乘此時以陳易新則  
無時而可伏望聖慈詳酌檢會臣等前奏早賜處分施  
行不勝至幸

代江東諸司論淮東不當和糴劄子



臣等近者傳聞朝廷已降指揮令淮東總領所支降錢銀於淮東路和糴十萬碩椿管者臣等竊謂今歲旱傷甚廣幸而旁近一二州軍得熟鄰郡有可告糴客旅有可興販以臣等所聞淮東一路惟揚楚間頗熟然亦出米無幾今若朝廷和糴十萬此聲一出則一路閉糴價必騰踴非唯鄰郡無告糴之所而客販阻遏飢民愈見費力且如建康見分頭亦於彼處收糴及招邀客販以濟目前既聞有和糴指揮人皆疑惑其他州郡亦可想

見且常平倉古今稱為良法者蓋緣米賤則收糶米貴則出糶及價平乃止凡以為民耳今歲亢旱如此粒食既艱臣等方望朝廷出糶積米以平市直而更下和糶之令亦恐有傳聞不實以淮東大熟奏聞者伏望聖慈詳酌如已降指揮即乞且與權住候來年秋成收糶未為晚也臣等狂愚抵突天威惶懼之至

代論私鹽妄通平人之弊劄子

臣竊惟私鹽之禁在於絕私販今州縣鞫鹽囚必使多

通買鹽之家私販僅獲數人而買鹽被繫者往往倍之  
獄吏得之以為奇貨且平時買鹽者囚既嘗享其利矣  
決不肯供通所通皆鬻而不售者耳信而追之適足為  
私販之助臣已一面約束外欲望朝廷指揮行下州縣  
應勘鞫鹽囚不得妄以買鹽為名追逮平人若情理切  
害有礙結獄者在縣則申州在州則申監司方許追證  
庶使無辜之民不致枉被禁繫

代論大囚到官先供大情然後送獄劄子

竊照乾道四年指揮應錄大辟先附囚口責狀一通覆  
視獄案果無差殊然後宣讀所以深革造次輕忽之弊然  
今復有可議者夫愚民吐辭初無條緒今供責之款粲  
然可讀而皆合於法者獄吏修飭為之也鍛鍊既久囚  
耳聆其狀而心記之熟矣若曰未嘗為盜而誣以為盜  
此愚民所得辨款辭之間不能惑也惟均於殺人而殺  
人之情可以生可以死均於為盜而為盜之情可以重  
可以輕責於款者有毫釐之分則定其罪者有天淵之

殊囚既不解法意惟習於款辭之熟一時附口責狀安知其曲折而盡變其款哉竊謂款之大情宜察其初方其捕至公庭未屬於吏其情最不可忽欲望朝廷特降指揮凡初捕凶盜委自長吏屏息捕入點差無干礙吏人當廳責供大狀然後送獄獄成儻與元責狀異同則別委無干礙官吏究其所以異同之因如是則吏不容姦刑不濫及足以仰副哀矜庶獄之意

代平江守臣乞截撥牙契錢修城劄子

臣聞州郡之有城壁如家居之藩籬也人之一家而藩籬茸治則室廬嚴謚居處者得其所安苟為不然頽圯斷闕行道之人皆得以逕則不特起盜竊之萌而氣象蕭條甚非有家之盛觀臣竊見平江當四達之衝井邑廣袤民物繁夥為兩浙劇郡一歲之間使命往來凡四經過而城壁不治乃視他郡尤甚臣自到任以來周視四圍多因積雨霖瀝歲久不葺遂致摧毀頽墻敗堞非惟盜賊私販貨夜度越無以限制而敵使觀瞻之際甚

非所以張國威壯形勢也臣檢準紹興六年三月一日  
指揮遂州城壁若倒塌稍多所用工力浩煩審度實用  
申尚書省又檢準隆興二年十二月五日勅節文應內  
地州郡城寨合行修葺者聽守令量力措置臣誤膺委  
寄假守輔藩目覩城壁廢壞如此豈敢憚煩避事苟安  
歲月不任其責今差官檢計得修城之夫約用若干工  
其所支費約用錢若干米若干竊緣本府財力窘匱用  
度至廣會其所入猶不足以供常費尋刷根行得惟有

牙契稅錢一項雖增虧不常以中數計歲收錢約有若干可以拘收應副修城使用方欲開具因依申奏朝廷乞行支撥間準本月二十一日指揮令提舉司拘收前件牙契稅錢撥隸制司充上供解發臣既見城壁廢壞不能自已取之于官既無所出募之於民又值去年水旱之後民力殫殘無以供應故敢不避斧鉞之誅冒犯天威欲望陛下詳覽臣所論修城利害特出聖斷許令本府將今年所收全年牙契稅錢免充上供解發專一



應副修城使用俾臣得以究心竭力繕治城壁屹然為  
當道壯觀內以為姦民之防外以彰形勝之威臣不勝  
大願惟陛下裁擇

免遷移城下墳塚劄子

准縣牒備准使帖委敦禮告示遷移墳塚事竊見城脚  
墳塚亦有民間舊來祖墳累經修城未嘗遷動盖不妨  
補砌城壁今若盡令發掘深恐未便今來相度除暴露  
遺骸疾速召人收瘞外所有墳塚欲各釘六七尺木椿

上書墳塚二字以為標幟其間有主墳塚即告示各家  
自行看覷無主墳塚即責令地分人照顧仍乞自使府  
行下監修官責令部役人不得於有墳塚處取土作踐  
及乞出榜立賞許令告首欲望鈞旨一例行下兩縣施  
行

代論起發官物雇舟之數劄子

臣竊見所至州縣凡遇起發官物和雇舟船百姓驚懼  
如遭驅擄呻吟怨呼之聲所不忍聞道路不通商旅斷

絕此傷和氣之大也臣嘗詢之其說不過有二曰官雇之直太薄曰留滯之日太久官雇薄則典剝衾裯以為賠備之資留滯久則侵耗官物有拘沒舟船之患此百姓所以不肯就雇者也欲望朝廷量增地里水腳之直應有裝發米錢且就所起數內尅支如米穀之屬則照時值折變支給仍嚴立減尅之禁先支其值而後裝發所有卸納去處亦立為條限如限內交卸不了許人越訴庶幾民情不至嗟怨為利甚大

又代論納稅不銷之弊劄子

臣竊惟有產則有稅自古然也今州縣之間每遇追催則嘆息愁恨盈于田里者無他焉蓋賦稅已納而官擾之不已也夫已納而被擾勾稽不明之過耳且輸納賦稅有戶鈔給之納戶有縣鈔付之勾稽今則不然縣鈔之與簿書徒為文具鈔之下縣者十無五六而簿書經年無勾稽之迹及至剋催則曰欠曰足惟案胥之手追者未必欠欠者未必追設有已納被追執戶鈔而去則

鈔留于案身拘于門其脫身請鈔之費不啻于倍納民  
安得而不怨哉況主簿自有勾稽欲望朝廷申嚴行下  
如遇納稅其主簿隨受納官辰入酉出稅纔納過隨即  
勾銷若縣道剋催即移文主簿取見欠不得只憑案吏  
便行追催若有已納被追之人許執戶鈔越訴依條施  
行

代論過界盜賊劄子

臣訪聞楚州淮陰縣五月初六日夜有淮北清河口劫

賊一百餘人過界前來本縣殺人放火劫奪財物及劫去縣獄罪人一名并官軍弓弩器仗又傷損縣尉驅擄知縣侯立中前去却至初九日放回臣頗聞沿淮對境比年以來排鋪甚密今有盜賊百餘人過界安得不知蓋緣淮南跳河之徒多往北界盜馬驚擾及至盜賊前來作過是致北界亦不禁止仰惟陛下聖謨神算方此養威持重以圖遠畧止因沿邊州軍不體朝廷大計屑屑細故隱匿事端今來盜賊作過至於殺掠軍民驅擄

官吏竊恐邊臣未必以實上聞欲望聖慈令兩淮帥臣及統兵官同共相度縱不可依彼排鋪即乞於沿淮諸縣如淮陰之類荒陋去處量增戍兵以防盜賊若置而不問竊恐他日有甚於此重勞朝廷處置取進止

代陳丞相論淮岸跳河及彼界來歸人劄子

臣待罪建康密邇兩淮偶有見聞須至奏知臣竊聞近日淮上跳河之人多往北界盜馬今年正月十五日及二月十六日北界嘗兩遣人兵至安豐軍對境爭鬧瀕

淮居民亦有奔走逃遁數日而後定者又臣近日頗見  
樞密院劄下淮西總領司備據光州申解到歸正人王  
椿奉聖旨令淮西安撫司密切差人伴送至建康府御  
前軍收管支破請受如此者不一朝廷招納歸正人以  
係中原心固為甚善如臣之愚實有過慮臣竊見乾道  
四五年間敵取歸正人朝廷不得已發遣被遣之人號  
哭呼天大出怨言怒罵而去又聞隆興二年敵騎過淮  
以取歸正為詞江上洶洶日懼反側之變幸敵即引去



遂以安帖仰惟陛下厲精嘗膽規恢遠畧神謨廟算固  
有定論異時兵威一振邊境肅清則凡厥庶民悉歸版  
籍顧此屑屑一二未甚有益於事今來沿邊州軍不知  
朝廷大體時時有所接納竊恐影帶姦細為國生事萬  
一敵人或指名取索決至紛拏臣又聞近有饒州百姓  
馬狗兒者因過彼界為邏者所獲申到敵廷乃不殺不  
留却牒盱眙軍發還其意可見恐必為他日取人張本  
欲望聖慈戒敕沿邊守臣重立賞格嚴行禁戢跳河盜

馬之人及有彼界來歸者只一面令說諭遣回不許接  
納免起爭端以貽後悔

--	--	--	--	--	--	--	--